

TE HEHEURAA API.

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"E te taata atoa no to'u nei i'oa i faarue ai i te fare, e te mau taeae, e te mau tuahine, e te metua tane, e te metua vahine, e te vahine iho, e te tamarii e te fenua, e hanere atu ia ta'na e noaa, e e roaa ia'na te ora muri ore." Mat. 19: 29.

Nu. 7.

10 Eperera, 1909.

Mat. 2.

Roto Miti, 6 no Mati, 1909.

Na te Ekalesia a Iesu Mesia i te Feia Mo'a i te Mau Mahana Hopea Nei i te mau fenua moana aihu'araau no Farani i Oceania:

Ia ora na outou i te aroha o to tatou Fatu, te aveia no te ra'i, te Tamaiti a te Atua, o Iesu Mesia. I teie nei â mahana ua tuu atura vau i te rima aroha i to tatou taeae o Viliamu Tetemila e i ta'na vahine o Maria Tetemila e i ta raua na tamarii toomaha i to ratou faarueraa ia Roto Miti e i te revaraa'tu ia outou na. I teie nei â mahana ua tuu atu matou ia ratou ma te aroha i te revaraa, arau a'e outou e farii mai ia ratou ma te aroha i te farereiraa. Ua au roa te aroha no te tuuraa'tu e ua au hoi te aroha no te fare-reiraa. O teie te tumu hoê roa i reva'tu ai Viliamu ia outou na, oia hoi ia roaa ia outou te maitai, ia ite outou i te Atua mau e ia haapii e ia haapao hoi outou i ta'na mau ture o tei ore i anoinohia i te mau parau tutuu a te taata nei. Aita oia i haere atu e imi i te hoê maitai no'na iho, no te mea ua hau to ô nei maitai. Aita oia i haere atu e imi te tao'a, e i



te fenua, e i te roo maitai, e i te tahi mea e i te tahi mea, no te mea ua hau to ō nei tao'a, e te fenua, e te roo maitai, e i tera mea e i tera mea. Ua parauhia râ oia e te perepheta a te Atua Mana Hope e poro haere i te evanelia a Iesu Mesia. E rave itoitō Viliamu i te ohipa i te ao e te rui ei tauturu ia outou i te noaaraa to outou paari, e to outou ite, e to outou faaroo, e to outou mana i nia i te mau ino atoa e vai i roto i teie nei ao.

Teie ta'u parau ia outou e to te Ekalesia e, a faaroo mai na i to'u reo tei pii atu ia outou na i te atea ê e pae tausani maile te area: A faaroo papu outou i ta Viliamu mau parau, a hi'opoa maite, a feruri, a haamana'o ma te aau pure e na te Atua outou e faaite mai e tavini mau oia no te Atua, e parau mau ta'na mau parau. Ei reira te hoê mea toe ia outou na, oia hoi a *HAAPAO* i te mau ture a te Atua ta'na i haapii atu. Te papai nei au i te parau *HAA-PAO* i te mau reta rarahi ia ore te reira ia moe vave ia outou na, e ia ite outou, aita roa to te haapiiraa e faufaa, aita hoi to te ite e to te paari e to te mana e to te mau mea atoa e faufaa maori râ ia haapao-atoa-hia te mau mea atoa i haapiihia. Ia haapii e tia'i, e ia haapao atoa e tia'i. Ua faarue Viliamu i to'na fenua e i to'na mau hoa, e i to'na mau fetii e i te tino no te ekalesia ei hopoi atu i te parau heheu a te Atua ia outou na. Ua mauruuru anei outou? E, ua mauruuru roa. Ua mauruuru anei Viliamu? E, ua mauruuru atoa Viliamu mai te mea e faaau maite outou i to outou haerea i to te Atua hinaaro, oia hoi,

Ia imi i te ite, eiaha ia faatau,

Ia haapii hua i tei maitai, eiaha ia parahi noa,

Ia aroha noa, eiaha e tama'i,

Ia horoa noa'tu, eiaha e eiâ,

Ia tia ta outou parau, eiaha e haavare,

Ia haapao i te faito tia, eiaha e imi i ta vetahi ê ia pau,

Ia haapii i te ohipa toroa, eiaha ia ma'ua,

Ia parau haamaitai atu, eiaha ia hopoi i te parau ino,

Ia haamori i te Atua mau, oia hoi a haapao i ta'na parau. O tera ia te haamori mau.

E toopiti â orometua tei reva atoa'tu, oia hoi o Tira e o Nataniela.—FARANI TUTERERA.

Tahiti e te Mau Fenua'toa i Au Mai

1. O Tahiti nei, o te fenua ia i faarirohia ei nohoraa arii, faaterehia'i te hau arii i Tahiti e i te mau fenua'toa i au mai. 2. O te fenua ia i itea-matamua-hia e te popaa i te tau o to'na eteneraa, a hamatahia'i te mau peu a te popaa. 3. O te fenua ia i tapaehia mai e te mau orometua poro evanelia (Porosetani) i to ratou tere. 4. O te fenua ia ta te hau Farani, i faariro ei nohoraa no to'na mau taata faatere hau. 5. O te fenua ia i faarirohia ei nohoraa no te mau haapaoraa te Katolika, te Moromona, te Petania, te Sanito, te Porosetani e no te mau haapiiraa e rave rahi, e no te mau ohipa hooraa tao'a, e no te tapaeraa pahi, e ei amui-raa taata no te mau fenua êê mai. Te pae fenua i te Tuamotu e Raiatea ma, ua amuihia ia ei hoê i raro a'e i te faatereraa no Tahiti. No reira ua riro Tahiti ei fenua roo maitai i te mau fenua moana i apatoa nei.

TE TAATA NO TAHITI E NO TE MAU FENUA ATOA I AU MAI.

E mau taata ite ore to ratou mau tupuna i te mau peu mai to teie nei anotau, i to ratou poiriraa ra. Ia tae mai râ te mau popaa, e ia faaterehia hoi te ture, e te hau, e te parau evanelia, e te mau peu maitatai, riro ihora Tahiti e te mau fenua'toa i au mai ei fenua hau, e te mau taata ei mau aroha noa, e te here, e te hamani maitai. Moe atura ia ratou te mau peu o to ratou eteneraa, oia hoi te taparahi taata, te au ore, e te aroha ore.

TEI TUPU I TE MAU TAU.

I te taeraa mai te mau peu a te popaa i Tahiti nei, te

vai noa nei â ia, te huru te huru, oia hoi te mau peu areare'a, te mau haapiiraa tamarii, e te faatereraa o te hau te maitai noa ra ia, aita i huru ê.

Teie râ te huru ê, oia hoi te haapiiraa a te mau orometua evanelia. Te haapii nei te tahi orometua i ta'na mau pîpî e, eiaha roa e aroha'tu i te mau taata i rapae i te ekalesia, e to roto atoa i te tahi haapaoraa e, eiaha e horoa i te maa, eiaha e au atu, eiaha e amui te parahiraa i te utuafare hoê, no te mea e haireti ana'e ratou.

Te haapii ra te tahi orometua i ta'na mau pîpî i te mau parau faaino, e te faahapa ia vetahi ê, ia tupu te mana'o ino o ta'na mau pîpî. Te haapii ra te tahi orometua, e te haaparare ra i te mau parau faaite i te mau vahi atoa e, eiaha roa e aroha'tu i te mau taata i parauhia e orometua, eiaha e horoa i te maa e te fare taoto ra, eiaha e parau e, "Ia ora na," eiaha e parau e, "Haere mai e tamaa."

E rave rahi atu â te mau haapiiraa na te mau orometua evanelia, e ua faariihia hoi taua mau haapiiraa ra, e ua faaitoito roa hoi te mau taata i nia iho i taua mau parau ra. I te faariroraa ia'na iho ei taata aroha ore, ei taata vaha-vaha i te taata, ei taata horoa ino, e ei taata haapao i te mau ohipa e au i te mana'o o to'na taata aratai. "E hape â te taata i te e'a e, e mea tia te hopea ra o taua e'a ra, o te hape ia." Maseli.

E au mau hoa e, a hi'o i te mau ohipa i faaterehia i rotopu ia tatou nei. O tehea tei huru e, mai te taeraa mai o te popaa e tae roa mai i teie nei? O te mau arearea anei? O te mau haapiiraa tamarii anei? O te faatereraa anei o te hau? O te mau ohipa hoora ta'na anei?

Te mana'o nei au e, e huru ê rii â ia, area râ tei hau roa ra, o te mau haapaoraa ia. Aita te tahi e au i te tahi; e feii te tahi i te tahi; e faaino te tahi i te tahi; tupu noa'i ratou. Mai te mea râ e, o ratou te tumu o te ino, te faaho'i nei ia tatou i to tatou eteneraa ra. No reira, a hi'opoa te mau mea'toa, e te maitai a tapea maite.— TOAE.

Te Mooraa i te Ava e te Feia Tauturu i te Raveraa i te Mara

Ua neneihia te parau i raro nei i roto i te vea no te mau faatere pereoo auauahi no te fenua Amerika ei faaiteraa i te feia e au ia parauhia ei tumu tauturu no te mau ino i tupu no te hooraa i te ava faataero.

Ua haavahia te hoê taata i te hara taparahi taata, e ua faaitehia e te mau ite ua taparahi pohe roa oia i ta'na iho vahine. Ua ui maira te haava ia'na e parau anei ta'na e ore ai e au ai ia faautuahia oia i te utua pohe. Tia'era te taata taparahi taata ra i nia, e ua na ô atura oia i mua i te aro o te haava, e te mau ite, e te hui raatira no te fenua i tairuru mai e faaroo i te parau no te haavaraa, "E ere o vau ana'e te taata i rave i teie nei hara rahi." Araara a'era te mana'o o te haava e to te feia atoa i faaroo i ta'na parau, maere roa ihora ratou atoa, ui ihora ratou ratou iho na ô ihora, o vai te taata i tauturu atu i teie nei taata i te taparahiraa i ta'na vahine? Ua parau faahou atura taua taata taparahi taata ra, na ô atura, "E te haava e, te parau faahou atu nei â vau e ere o vau ana'e te taata i taparahi pohe roa i ta'u vahine, o teie râ te mau taata i tauturu mai ia'u i te taparahiraa i ta'u vahine, oia hoi te haava i nia i to'na parahiraa, te mau horeo, te rahiraa o te mau ite, e te mau orometua atoa o te ekalesia, e feia taparahi taata ana'e hoi ratou i mua i te aro o te Atua Mana Hope, e e haavahia ratou e o vau atoa i mua i Ta'na ra haavaraa tia roa. Ahiri aita te fare ava, i teie nei oire, aita vau i riro ei taata taero ava, e aita ta'u vahine i taparahihia, e aita vau e tia i teie nei vahia faautuahia'i au i te utua pohe. Ahiri aita teie nei mau faahi'araa taata, oia hoi te mau fare ava, ua riro vau ei taata haapao maitai, ei taata rave ohipa ma te itoito, ei metua here, e ei tara tane aroha. I teie nei râ, ua amahamaha to'u nei utuafare, ua taparahihia ta'u vahine, e ua purara ta'u mau tamarii i roto i te toetoe,

e ua fatata vau i te taríhia e te rima puai no te hau. Ua tamata pinepine atura vau i te fariu mai, aita râ i tia a vai noa'i te fare ava i mua i to'u nei e'a, aita to'u mana'o paruparu ma'ihia e au i te puai no to'u hiaairaa i te ava. Aita roa te hoê fare ava i roto i teie nei oire e hope roa'e te hoê matahiti. I taua matahiti ihora ua riro vau ei taata haapao maitai, ua oaoa noa ta'u vahine e ta'u mau tamarii atoa, e ua riro to'u utuafare mai te paradaiso te huru. O vau te hoê o te mau taata i papai i te parau i te mau faaterehau ei aniraa ia ore ia faatia-faahou-hia te hooraa i te ava. Ua tun atura te haava, o te parahi nei i nia i to'na parahiraa i mua i to tatou aro, e te haava uiui parau atoa, e te rahiraa o te mau horeo, i ta ratou parau maiti ei faatiaraa i te hooraa i te ava i to'u nei oire. Ua rahi te taata tei faatia, e ua iti tei patoi i te hooraa i te ava, e no reira ua iriti-faahou-hia te opâni no te mau fare ava, e na te mau fare ava i faariro ia'u ei taparahi taata. Ua haamata'tura vau i to'u nei haerea hara i roto i te fare ava i faatiahia e te hui raatira no teie nei oire. Ua faatia outou i te mau fare ava e na te fare ava i faariro ia'u ei taata taero ava e ei taparahi taata, e teie nei ua putohia vau i mua i te aro o te haavaraa, e no te ture e faautuahia au i te pohe ia hoparahia vau i rapae au i teie nei ao. E tia vau i mua i haavaraa a te Atua e ei reira atoa outou o tei faatia i te hooraa i te ava i te maitiraa no te hau. Te mana'o nei anei outou e o vau ana'e te faautuahia e te Atua no te taparahiraa i ta'u vahine, e eiaha outou atoa? Eiaha roa ia; i to'u taeroraa ua taparahi au i te tahi, o outou râ o tei faatia i te hooraa i te ava i roto i te mau maitiraa no te hau, ua taparahi outou i te taata e rave rahi te tausaniraa, e no to outou faatiaraa, te hoohia nei â te ava i teie nei â. Te ite nei outou atoa e ere teie nei mau parau i te parau aoaoa, o te parau mau râ ia a te Atua Mana Hope. Ua faatia outou i te mau fare ava o tei faariro ia'u ei taero ava e ei taparahi taata, e no reira ua riro outou atoa ei feia hara tauturu ia'u



i te taparahîraa i ta'u vahine. E te haava e, tirara ta'u parau, ua ineine au e farîi i te parau faautuaraa e ia arataihia i te tarîraa. Te faaoti nei au i ta'u parau ma te ani atu i te Atua ia iritihia te paruru i nia i to outou mata po ia ite outou e, o outou te tumu no te mau hara e rave rahi, e ia ore outou ia faatia faahou â i te hooraa i te ava faataero."

—FARANI TUTERERA.

I te 27 no Mati i te hora maha i te ahiahi, ua tae mai te tahi mau hoa no matou i Papeete nei, oia hoi te mau taata o tei farîi i te mau orometua i Afareaitu, Moorea, Ua haere mai ratou e farerei i te Peresideni Moromona, o Viliamu to'na i'oa, te mono no Farani Tuterera i te mau fenua moana nei, o tei tae mai i nia i te Mariposa i te 22 no Mati.

Ua tae mai ratou ma te aau popou e te maru, i te mea ra e, ua hinaaro ratou e farerei ia'na e ta'na vahine e te mau tamarîi atoa, i to'na tae-faahou-raa mai i teie nei mau fenua.

Ua haere mai ratou i te fare no te mau orometua, e ua himene mai ratou i te mau himene tamahanahanaraa aau e te faahiahia rahi. Ia tae atu i te Mahana Piti ua ho'i atu ratou i to ratou fenua i Moorea ma te maitai. Mai te Mahana Maa e tae noa'tu i te Monire, ua himene matou e ua haapîi atu i te evanelia na roto i ta matou mau tairururaa po e te ao.

"Oia mau, te parau faahou atu nei au ia outou, e to te ao taatoa nei, e tia ia'u i te Fatu ia faaite i teie nei mau mea i te taata atoa, aore hoi au e haapao na i te huru o te taata, e te titau nei au ia ite te taata atoa e te fatata maira te mahana aore â i taeahia tē hora, te fatata mai nei râ e afai-ê-hia'i te hau i te ao nei, e mana'i hoi te diabolô i to'na iho nei hau; e mana atoa hoi te Fatu i nia i to'na ihora feia mo'a, e arii hoi oia i rotopu ia ratou, e topa maira ta'na tahoo i nia ia Edoma, oia hoi i te ao nei." B. F. 1: 34-36. B, F. S. 1: 6.

E Ao to te Taata e Faaoromai i te Ati

“E ao to te taata e faaoromai i te ati, ua tia-ana’e-hia mai hoi oia ra, e roaa ia ia’na te korona ora, i ta te Fatu i parau mai e no te feia i hinaaro ia’na ra.” Iakobo 1: 12.

Teie te hoê parau rahi, aita roa e parau i hau roa’tu i teie, i roto i te buka mo’a, aita hoi e parau i faahitihia e te taata i hau roa’tu i teie. E faaoromai te tabi mau taata i te ati rahi, ia ore ratou ia faaoti maitai i te ohipa i tuuhia i nia iho ia ratou ra, e fariu ê atu te taata i te ohipa maitai, ia riro noa’tu i to’na iho hinaaro tia ore. Ua mana’o ratou e, mai te mea e manuïa ta ratou mau titauroa, ia ore ia farerei i te tufaa ohipa i mana’ohia e tuu i nia iho ia ratou i roto i te fare pureraa, e aore râ i roto i te mau tai-rururaa atoa; ua mana’o paha ratou e ua manuïa taua ohipa ra. Aita roa ia te taata e manuïa i roto i teie nei ao, maori râ e tuu ta’na taponono ei tauturu i te ohipa teiaha i to tatou aro.

E ao to te taata faaoromai i te ati, e te mau huru hamani-ino-raa atoa ra, ia haere maite ona i nia i te e’a ma te auene ore, ia ore oia e fariu atu i pae atoa, e aore râ i te pae aui, ia haere atu oia ma te aveia i te rima, ma te mana’o ra e, e huri au i te mau ofai rarahi i rapae i to’u e’a, e manuïa ona, no te mea i te mau ati e rave rahi, te ino e te mau huru peapea ta’na i ite, ua riro teie ei faaeta-etaraa i to’na ra tino, ia vî te mau huru ati atoa ia’na. Mai te au i te taata tupai auri, ia hinaaro oia e haapaari i te tahi auri ei mea etaeta, e te paari, e tuu oia i teie i roto i te auahi veavea roa, e na reira atoa hoi te taata. Te mau ati, te oto, te mamae, te pariraa e te mau huru hamani-ino-raa atoa, e faariro teie ei tino etaeta e te auene ore. Ia tamata tatou ia ore ia farerei i te mau huru ati, aita e manuïa, no te mea ra e, na te Atua teie i faatia ei maitai no te taata atoa, e teie hoi te auahi e tuuhia i nia iho ia tatou. Ia ore te taata tupai auri ia tuu i te auri i roto i te

auahi veavea roa, aita e paari maitai, e mea paruparu râ. E no reira, o te Atua te tumu no te mau mea atoa ra ma to'na ite, te paari, e te maramarama rahi; ua opua hoi oia i teie, hou te hamaniraa no teie nei ao. E no reira ia hinaaro oia e faariro i te taata ei taata tino etaeta e te puai, e tuu oia ia'na i roto i te mau ati e rave rahi; no reira teie te tumu i tonono mai ai te Atua ia Iesu Metia i roto i te ao nei, no te mea ua ite te Atua e, e faaoromai Iesu Mesia i te mau hamani-ino-raa atoa. Uiraa: No te aha ua faaoromai o Iesu Mesia i teie nei hamani-ino-raa rahi? Pahonoraa: No to'na aroha rahi i to te ao nei. E no reira ua faaineine te Atua i te mau taata auene ore no te faatererara i ta'na ra ohipa i roto i te ao nei. E na'na i maiti i taua mau taata ra ei afai haere atu i te evanelia i to te ao nei, ia haapii atu i te parau mau a te Fatu, no te mea ua ite oia e farerei ratou i te mau huru e rave rahi, no reira ua parau mai Paulo:

“E te feia atoa e opua e haapao i te paiete ei roto â i te Mesia ra ia Iesu, E hamani-ino-atoa-hia ia.” II Tim. 3: 12.

Te Ekalesia a Iesu Mesia i te Feia Mo'a i te Mau Mahana Hopea Nei, e mea hau roa'tu to ratou hamani-ino-raa, i to te mau haapaoraa atoa, e na to ratou mau enem i faaite mai i te reira, e e ui mai ratou e, teihea te mau taata o tei faaoromai mai ia ratou ra te huru? Teihea atoa te tane, te vahine e te tamarii e faaoromai mai ia ratou ra? Ua tairihia ratou, e ua tiahihia ratou i rapae i to ratou mau fenua e to ratou mau enem i. Ua tutui te mau enem i to ratou mau fare, e ua riro ta ratou mau tao'a ia vetahi ê, e ua pupuhihia, e aore râ ua tairi-puai-roa-hia ratou i mua i te mata o to te utuafare. Ua tiahihia ratou i rapae i to ratou fenua mau i roto i te medebara, e imi i te hapuraa no ratou e te mau tamarii, ua na reirahia teie nei ohipa e to ratou mau enem i te fenua ra o Amerika i te tufaa fenua Misor i Ilinoi atoa hoi. Area râ te oaoa nei ratou i te mea ra e, ua maitihia ratou no te mau hinaaro o te Fatu. E ua mauruuru atoa ratou no te mea te haere nei ratou na roto i teie nei

auahi. "Inaha tatou, te parau nei tatou e, e ao to te feia i tamau maite i te faaoromai o Ioba rā, e ua ite hoi outou i te te Fatu i rave i te hopea e; e ua i te Fatu i te aroha, e te hamani maitai rahi." Iak. 5: 11. —SOLONA.

Te Tatarahapa

Te mau haapaoraa Cherisetiano atoa o te vai nei, e te tahi atu ā mau haapaoraa, o tei parau mai e, "A tatarahapa ia roaa te ora mure ore." Area rā e mea ē roa te mana'o no taua mau haapaoraa ra i nia i teie nei parau "tatarahapa," e te mau mea e au i te tatarahapa mau i haapiihia i roto i te buka mo'a.

Na mua to tatou imiraa i te auraa no te tatarahapa, a imi i te auraa no te hara na mua; ia ore ia ite i te hara, aita e nehenene ia ite i te tatarahapa. Te rahiraa no te mau buka e te a'oraa paran i papaihia ei faaiteraa i te auraa no te hara, mai te mea ia haaputuputuhia taua mau buka ra, e i roa te hoē vairaa buka rahi roa, e no reira ua faaite mai o Ioanē pipi here i te parau poto roa i te auraa mau. Na ô atura oia:

"O te rave i te hara ra, ua faahapa ia i te ture; o te faahapa hoi i te ture ra, o te hara ia." 1 Ioa. 3: 4.

E no reira o te hara ia, o te ofatiraa i te ture. Ia rave te hoē taata i te hoē mea, i opanihia e te Atua ua hara atoa ia. A haamana'o tatou atoa i teie e tia'i, oia hoi, aita roa te mau ture atoa i oti i te papaihia i roto i te mau buka mo'a. Area rā na te natura o te taata i faaite mai e, eiaha e rave i tera, a rave rā i teie. E mea tia i te taata e haere na te purumu ia ite oia i to'na haerea. Area rā te haapii atu i te parau no te tatarahapa, e tia ia i te taata e tamau i te mau mea ta'na hinaaro, e te mau mea atoa, o tei au ia'na ra. E na te Atua iho i faaite mai i ta'na ra parau, e na roto i te mau heheuraa ua tanu oia i te maramarama i roto i te aau o te taata atoa ra, ia aratai atu ia ratou i te ora mure ore ra. — SOLONA.

Te Mau Parau Api.

I te 5 no Febuare ua pohe roa na taata e 50 i te fenua Alemanian i te pape pue rahi.

Te parau nei te tahi pae o te feia i te o tei hi'opoa i to te ra'i e mau apoo hohonu to te ra'i aita to reira e fetia, e te pahono mai nei te tahi pae ua i taua mau apoo hohonu i te mau fetia parari anaana ore, e no reira te huru pouri o taua mau apoo ra ia hi'ohia'tu na roto i te mau hi'o faarahi.

I te 10 no Mati i te oire ra o Ararata i te fenua ra o Niu Zilani, ua pohe te hoê taata ra, o Totoko to'na i'oa, i te ma'i; ei muri iho ua mana'o te mau taata ua pohe roa oia, e ua haamata ratou e faaineine i to'na ra mau ahu, e te afata no te tanuraa. E i muri iho ua tia oia i nia, e ua pii atu oia i te mau taata e hopoi mai ia'na e piti huero moa i tunuhia.

Ua tupu i te hoê peapea rahi i te 10 no Mati i te fenua ra o Niu Zilani. I te tereraa no te hoê pahi i nia i te anavai pape rahi i taua fenua ra, ua paapaa i te auahi, e ua pohe roa e na taata e 1,000. E e rave rahi i te hanere taata i o'ahia i roto i te pape ia ore ratou e paapaa i te auahi. E i muri iho ua afai atu i uta e 200 taata e tiahapa i pohe roa o tei panu noa i nia i te pape.

Ua mana'ohia e o Iose Guadelope Alcala no te fenua ra o Mexico te taata ruau roa i roto i te ao atoa nei. Ua fanau oia i te m. 1770, e te ora noa nei â oia i teie nei â, 139 to'na ra matahiti. E toru tenetere ta'na i ite: ua fanau oia i te pae hopea no te tenetere 18, ua ora oia e hope roa'e te tenetere 19, e te ora nei â oia i te pae matamua no te tenetere e 20 i teie nei â.

I te mahana e 23 no Tenuare ua faaite atura te mau machine no te hau Amerika, e no Farani, e no Beritane, e no Alemanian, e no te tahi atu â mau hau rarahi, ua aueue te fenua ma te u'ana rahi i taua mahana ra, aita râ te mau machine i tapao i te vahi i aueuehia. Ua tiai maoro te mau hau, aita râ to te hoê fenua i faaite mai e, ua aueue to ratou fenua, e no reira ua mana'ohia e, ua aueue te fenua i raro i te miti, e aore râ i te hoê vahi taata ore i taua mahana ra. I te avae râ o Febuare ua-tae mai te parau na ô mai i te fenua ra o Peresia i te faaiteraa mai e, ua aueue te tahi tufaa rahi no to ratou fenua i taua mahana ihora, te 23 no Tenuare, e ua pau e 60 oire, e ua tausaniaraa te taata i pohe roa. Tera te tumu i maoro ai taua pau rahi ra i te faaiteraahia mai, oia hoi, aita to taua tufaa fenua rahi no Peresia i aueuehia ra e te niuniuraa parau, e no reira tirara ta ratou ravea ei faaite mai i to ratou ati tei na roto i te rata papai. E no te atea o taua fenua ra, ua maoro te rata i te hopoiraahia mai. Ahiri e niuniuraa parau ta ratou ra, ua ite-vave-hia to ratou ati e to te ao e tia'i i to te ao ia tauturu atu.

Ua iteahia i Lonedona e na afata e 600 mamoe no Amerika i ma'ihia, e ua parau mai to Amerika ua mataitaihia ratou i te reira hou ta ratou i hapono atu i te reira i Lonedona, ua ma'ihia taua na afata ra mamoe, e aita nehenehe ia ratou i amu.

Teie te ohipa i oti i te mau orometua Moromona i te pae apatoa i Amerika i te matahiti 1908: 176,146 utuafare ta ratou i mataitai, 16,248 parapauraa evanelia, 333,483 buka iti i operehia, 3,301 pureraa i haa-pahia, 840 taata i baptizohia, e 627 tamarii i haamaitaihia.

I te mahana 7 no Mati i te fenua ra o Amerika i te pae hiti o te râ, ua paruruhia e na pereoo auahi e 100 i te vero rahi. Ua mairi mai ai te hiona i nia iho i te purumu no te pereoo, ia ore te pereoo e haere. E mea teitei roa te hiona i nia iho i te purumu, e i muri iho ua tahe noa te hiona i te mahana, e ua haere atura te mau pereoo.

I te haereraa e na te taata e piti na nia i te pereoo i te oire ra o Marua i te fenua ra o Niu Zilani, ua tupu te ati mai te mea ra e, na te tamanine no te metua i faahoro ia'na i roto i te pereoo. E ua huru matapo te metua, no reira ua tupu to'na mata'u i te tahi mea i te pae purumu, e ua mau oia i te mau taura no roto mai i te rima no to'na tamahine, e ua huti mai te puaa i muri, e i muri iho ua taviri te puahorofenua i te pereoo, e ua huri te pereoo i nia iho ia raua. Ua pepe to raua tino i te pereoo, e ua mutu-mutu roa te mata no te vahine paari i te ofai.

I te 23 no Tenuare ua û te pahi auahi ra o Repupirita e te pahi auahi ra Florida i tua i te rui, taa ê atura na pahi ra e moe vave atura te Florida i roto i te pouri taotao no te rui. Ua hi'opoa'tura te raatira no te Repupirita i to'na pahi e ua itea te hoê apoo rahi i te pae pahi i raro a'e i te miti, e parari rahi roa, e ua i te tahi mau piha no te pahi i te riu, e aita roa te hoê pahi i fatata mai ei faurao. E ono taata i pohe roa i te puai no te ûraa. Tei nia i te pahi te hoê machine e hapono atu i te parau na roto i te reva aita e niuniu, e no reira ua haponohia te parau faaite na roto i te reva i te pae apatoerau, e i te apatoa, i te hitia o te râ e i te tooa o te râ ma te ani atu i te mau pahi e haere mai e faaora i to te pahi. Ua itea taua mau parau aniraa ra e te mau pahi i tua e rave rahi, e ua tere oioi ratou i te pae miti i û ai na pahi ra, roohia mai te pahi parari e ua faaorahia te taata atoa, aita te hoê i ino maori râ na taata e ono i pohe i te ûraa. Aita i maoro moe roa atura te pahi i raro i te miti. 1600 taata i faaorahia no nia mai i taua pahi ra.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.